

VIJEĆE ZA MIRNO RJEŠAVANJE SPORA

Banja Luka, 27.10.2021. godine

17 -11- 2021

BOSNA I HERCEGOVINA - BOSNA I HERCEGOVINA
UPRAVA ZA INDIREKTNO-NEIZRAVNO OPOREZIVANJE
УПРАВА ЗА ИНДИРЕКТНО ОПОРЕЗИВАЊЕ
BANJA LUKA - BANJA LUKA

SINDIKAT UPO 16.11.2021

Broj predmeta: 16-11-2021			
Broj jedinica	Klas. oznaka	Redni broj	Broj priloga
Broj jedinica	Klas. oznaka	Redni broj	Broj priloga
01-50-5-416-19/21			

ZAPISNIK**sa sastanka Vijeća za mirno rješavanje spora**

Sastanak Vijeća za mirno rješavanje spora je održan 27.10.2021. godine u prostorijama Središnjeg ureda, s početkom u 13:00 časova.

Sastanku su prisustvovali:

- a) Predstavnici ispred Uprave za indirektno-neizravno oporezivanje kao poslodavca:
 1. Elvir Muminović, pomoćnik direktora za Sektor za poslovne usluge,
 2. Vladimir Dragičević, pomoćnik direktora za Sektor za carine,
 3. Slavojka Stolić, šef odsjeka za finansijsko upravljanje.
- b) Predstavnici ispred Sindikata Uprave za indirektno-neizravno oporezivanje:
 1. Nermin Jusić, predsjednik Upravnog odbora Sindikata Uprave za indirektno-neizravno oporezivanje,
 2. Milan Tomas, član Upravnog odbora Sindikata Uprave za indirektno-neizravno oporezivanje,
 3. Darko Topić, član Upravnog odbora Sindikata Uprave za indirektno-neizravno oporezivanje.

Sastanak Vijeća za mirno rješavanje spora je otvorio Nermin Jusić, pozdravio prisutne, zahvalio se na dolasku, te predložio da se na sastanku raspravlja o prijedlogu za mirno rješavanje spora koji je uputio Sindikat Uprave za indirektno-neizravno oporezivanje aktom broj 47/9-07/21 od 22.07.2021. godine.

Nermin Jusić je upoznao prisutne da nakon najave štrajka, shodno odredbama Zakona o štrajku zaposlenih u institucijama Bosne i Hercegovine, organizator štrajka (Sindikat UINO) i poslodavac (UINO) su ovim sastankom započeli sporazumno rješavanje spora. Ispred poslodavca UINO direktor UINO je aktom broj 01-50-5-416-8/21 od 11.08.2021. godine imenovao predstavnike UINO, a Sindikat UINO je aktom broj 47/9-07/21 od 22.07.2021. godine imenovao predstavnike sindikata. Konstatovano je da svi imenovani predstavnici obje strane u sporu prisustvuju sastanku Vijeća za mirno rješavanje spora.

Prijedlog Sindikata UINO za rješavanje ovog spora je da se poslodavac UINO putem Upravnog odbora UINO obrati Vijeću ministara BiH zahtjevajući realizaciju slijedećih spornih pitanja:

1. Hitno vraćanje osnovice za obračun plaća zaposlenih u UINO na iznos od 498,10 KM,
2. Ispravka diskriminirajuće Odluke Vijeća ministara BiH o načinu i postupku ostvarivanja prava zaposlenih u institucijama BiH na troškove smještaja, naknadu za odvojen život i naknadu za privremeno raspoređivanje,
3. Hitna izrada novog Zakona o plaćama i naknadama u institucijama BiH,
4. Otpočinjanje postupka Kolektivnog pregovaranja.

Elvir Muminović je konstatovao da je procedura mirnog rješavanja ovog spora precizno propisana Zakonom o štrajku zaposlenih u institucijama Bosne i Hercegovine, kao i da shodno odredbama člana 3. Zakona o štrajku UINO predstavlja poslodavca, mada niti jedno od postavljenih spornih pitanja čije rješenje traži Sindikat UINO nije u nadležnosti Uprave za indirektno-neizravno oporezivanje kao poslodavca. Ipak, menadžment UINO podržava inicijativu i nastojanja Sindikata UINO da na ovaj način poboljša materijalno-radni status i položaj zaposlenih u UINO i uvijek će biti uz zaposlene u vezi ovakvih inicijativa.

Vladimir Dragičević je istakao da su slična pitanja već bila delegirana ispred menadžmenta UINO i da se odgovori i postupanja od Vijeća ministara BiH i drugih nadležnih organa očekuju već duže vrijeme. Pitanja koja je delegirao Sindikat UINO se velikim dijelom poklapaju sa sličnim inicijativama menadžmenta UINO. Uglavnom, zajedničko svima je poboljšanje materijalnog stanja zaposlenih u UINO.

Elvir Muminović je upoznao prisutne da je na osnovu inicijativa menadžmenta UINO, pa i djelovanja Sindikata UINO dobijena načelna podrška Ministarstva finansija BiH, na osnovu čijeg prijedloga je Komisija za finansije i budžet Predstavničkog doma Parlamentarne skupštine na sastanku u julu 2021. godine prihvatila amandman kojim se predviđa da osnovica plate za zaposlene u institucijama BiH iznosi 498,10 KM.

Slavojka Stolić je potvrdila ove navode pomoćnika direktora rekavši da bi se na ovaj način plate vratile na nivo iz 2012. godine i izvršilo djelimično usklađivanje sa primanjima zaposlenih u entitetskim institucijama. Plata po ovoj osnovici bi se obračunavala u posljednjih pet mjeseci ove godine. Međutim, nakon sjednice Komisija za finansije i budžet Predstavničkog doma Parlamentarne skupštine jula 2021. godine toga je došlo do sada već poznate blokade rada Vijeća ministara BiH i nadležnih institucija BiH, te je sada sve na čekanju.

Elvir Muminović je istako da zaposleni u UINO i zaslužuju bolje plate i bolji status u institucijama BiH, obzirom na rezultate koje Uprava za indirektno-neizravno oporezivanje BiH ostvaruje iz godine u godinu prikupljajući rekordne prihode bez obzira na dobro poznate krize ekonomije u svijetu i posljedice COVID-pandemije. Takvim zavidnim rezultatima su itekako doprinjeli zaposleni u UINO i država bi im se na neki način trebala odužiti za to. Međutim, obzirom da zadnje inicijative o povećanju osnovice na iznos od 498,10 KM nisu do kraja prošle zakonsku proceduru parlamentarnog izglasavanja, UINO je u pripremama nacrtu Budžeta BiH za 2022. godinu, a shodno svojim obavezama koje su propisane rokovima dobila upute da projekcije Budžeta UINO za 2022. godinu uradi na bazi osnovice od 475,69 KM kao i prethodnih godina što je i učinjeno. Ipak, smatramo da je potrebno kontinuirano raditi na imidžu UINO i češće isticati zavidne rezultate rada iz nadležnosti UINO.

Nermin Jusić je napomenuo da Sindikat UINO u svakom svom medijskom obraćanju uvijek ističe pozitivne rezultate rada UINO jer je to i istina, te na bazi tih rezultata i tražimo poseban odnos prema zaslužnim, a to su zaposleni u UINO. Tražimo da nas bar izjednače sa plaćama nižih nivoa vlasti u BiH (entiteti, kantoni i opštine), a mada bi trebali biti i iznad njih obzirom na značaj ove institucije za državu BiH.

Milan Tomas je istakao da bi rješenje svega navedenog bilo izdvajanje institucije UINO u poseban član Zakona o plaćama i naknadama u institucijama BiH, te podizanje osnovice za plaću na realan nivo. Sindikat UINO upravo i radi u tom pravcu, a jedan od načina je i ovo obraćanje našem poslodavcu. Smatra da, temeljem odredbi članka 10. Zakona o štrajku zaposlenih u institucijama BiH, u ovom postupku mirnog rješavanja spora, Vijeće za mirno rješavanje spora treba dostaviti strankama u sporu prijedlog za rješavanje spora ili konstatirati da mirno rješavanje spora nije uspjelo. Obzirom na opredjeljenost poslodavca da podrži zahtjeve Sindikata, smatra da bi se poslodavac trebao obratiti Vijeću ministara BiH i dostaviti zahtjeve Sindikata.

Slavojka Stolić smatra da se na osnovu dosadašnje diskusije ne može konstatovati da mirno rješavanje spora nije uspjelo jer menadžment UINO podržava prijedloge Sindikata UINO, već je potrebno samo usaglasiti načine postupanja do realizacije sindikalnih prijedloga.

Vladimir Dragičević je takođe istakao podršku sindikalnim prijedlozima, a predložio je sindikalnim predstavnicima da osim ovih načina sindikalne borbe, uđu i u intenzivnu komunikaciju i tzv. lobiranje poslaničkih grupa u Parlamentu BiH, jer bez njihove dobre volje i odluke nije moguće sve navedeno okončati do kraja.

Elvir Muminović je potvrdio neupitnu podršku menadžmenta UINO sindikalnim prijedlozima i predložio sindikalnim predstavnicima da sindikat u budućem radu ostvari intenzivniju komunikaciju i sa članovima Komisije za vanjsku trgovinu i carine Predstavničkog doma Parlamentarne skupštine BiH kako bi iste upoznao sa lošim materijalnim položajem carinskih službenika i ostalih zaposlenih u UINO jer bi podrška članova te Komisije bila vrlo značajna pri krajnjem ishodu usvajanja sindikalnih zahtjeva.

Darko Topić je zaključio da je iz svih obraćanja na današnjoj sjednici Vijeća za mirno rješavanje spora evidentno da su svi pružili podršku saglasnosti prijedlozima Sindikata UINO. Takođe smatra da obzirom na zakonski propisane rokove treba ispoštovati odredbe Zakona o štrajku zaposlenih u institucijama BiH, te da se možda mogu objediniti tačke prijedloga koje se odnose na osnovicu plaće i izmjene odredbi Zakona o plaćama i naknadama u institucijama BiH.

Na kraju rasprave, članovi Vijeća za mirno rješavanje spora su se usaglasili o slijedećem zaključku:

PRIJEDLOG ZA RJEŠAVANJE SPORA:

Poslodavac UINO će se putem Upravnog odbora UINO obratiti Vijeću ministara BiH zahtjevajući realizaciju slijedećih spornih pitanja:

1. Hitno vraćanje osnovice za obračun plaća zaposlenih u UINO na iznos od 498,10 KM (u 2021.godini), te na iznos od 535,00 KM (u 2022. godini),
2. Hitna izrada novog Zakona o plaćama i naknadama u institucijama BiH, u smislu:
 - a. izdvajanja zaposlenih u UINO od ostalih zaposlenih u institucijama BiH u poseban član Zakona, sa uvećanjem koeficijenta plaće za korektivni faktor 1,2, a zbog specifičnosti radnih mjesta i poslova iz nadležnosti UINO
 - b. revidiranja koeficijenta i platnih razreda zaposlenih u UINO u smislu približavanja i utvrđivanja realnih koeficijenta i platnih razreda prema opisu poslova, te izjednačiti razlike u vrijednostima koeficijenta između platnih razreda i između najnižeg i najvišeg koeficijenta bez obzira na stručnu spremu
3. Otpočinjanje postupka izrade i zaključivanja Kolektivnog ugovora za državne službenike i zaposlenike u institucijama Bosne i Hercegovine sa jasnim rokovima aktivnosti,
4. Izmjena Odluke o načinu i postupku ostvarivanja prava zaposlenih u institucijama BiH na troškove smještaja, naknadu za odvojen život i naknadu za privremeno raspoređivanje, u smislu da se Odlukom obuhvate svi zaposleni (a ne samo rukovodeći kadrovi UINO) koji se po potrebi službe premještaju u mjesto rada udaljeno od mjesta prebivališta više od 80 km.

Sastanak završio u 13.55 časova
Zapisnik izradio: Nermin Jusić


Dostaviti:

- Direktor UINO
- Sindikat UINO
- a/a

Članovi Mirovnog vijeća (Sindikata UINO)


Nermin Jusić


Milan Tomas


Darko Topić

Članovi Mirovnog vijeća (UINO)


Elvir Muminović


Vladimir Dragičević


Slavojka Stolić